



Broj:

Sarajevo, 31.12.2013.



**PREDSTAVNIČKOM DOMU
PARLAMENTARNE SKUPŠTINE
BOSNE I HERCEGOVINE**

PRIMLJENO: 31-12-2013			
Organizaciona jedinica	Klasifikaciona oznaka	Redni broj	Broj priloga
01-02-2		1354/13	

Predmet: Prijedlog rezolucije o provjeri porijekla imovine

Poštovani,

Na osnovu člana 148. st. (1) i (2) Poslovnika Predstavničkog doma („Službeni glasnik BiH“, br. 33/06, 41/06, 81/06, 91/06, 91/07, 87/09 i 28/12), podnosim **Prijedlog rezolucije o provjeri porijekla imovine.**

S poštovanjem,

dr. sc. Denis Bećirović
poslanik SDPBiH

Imajući u vidu da Predstavnički dom Parlamentarne skupštine Bosne i Hercegovine smatra da aktivna borba protiv organiziranog kriminala i korupcije predstavlja jednu od najprioritetnijih aktivnosti;

Uvažavajući ljudske slobode i prava građana u skladu sa Ustavom Bosne i Hercegovine, njenim zakonima i međunarodnim pravnim standardima;

Podržavajući sveobuhvatnu borbu protiv organiziranog kriminala i korupcije;

Svjesni važnosti izgradnje povjerenja u državne i entitetske zvaničnike u organima izvršne i zakonodavne vlasti i poštivanja Ustava Bosne i Hercegovine i zakona;

Opredijeljeni za daljnje jačanje zakonitosti, demokratizaciju društva i transparentnost svih predstavnika izvršne i zakonodavne vlasti; a

Na osnovu člana IV. 4. (e) Ustava Bosne i Hercegovine, člana 148. Poslovnika Predstavničkog doma („Službeni glasnik BiH“, br. 33/06, 41/06, 81/06, 91/06, 91/07, 87/09 i 28/12), Predstavnički dom Parlamentarne skupštine Bosne i Hercegovine je na __. sjednici, održanoj __. __.2014., usvojio

REZOLUCIJU **o provjeri porijekla imovine**

1. Predstavnički dom Parlamentarne skupštine Bosne i Hercegovine poziva nadležna tužilaštva i Državnu agenciju za istrage i zaštitu da, u saradnji s drugim organima vlasti, detaljno provjere porijeklo imovine članova Predsjedništva BiH, poslanika i delegata u Parlamentarnoj skupštini BiH, ministara i zamjenika ministara u Vijeću ministara BiH, predsjednika i potpredsjednika Federacije BiH i Republike Srpske, poslanika u Predstavničkom domu Parlamenta Federacije BiH i Narodnoj skupštini Republike Srpske, delegata u Domu naroda Parlamenta Federacije BiH i Vijeću naroda Republike Srpske, ministara i zamjenika ministara u Vladi Federacije BiH i Vladi Republike Srpske i predsjednika političkih stranaka koje imaju svoje predstavnike u organima izvršne i zakonodavne vlasti na državnom i entitetskom nivou.

2. Predstavnički dom Parlamentarne skupštine Bosne i Hercegovine smatra da svi navedeni državni zvaničnici trebaju, najkasnije u roku od 45 dana od dana usvajanja Rezolucije, pod punom materijalnom i krivičnom odgovornošću, dostaviti precizne, sveobuhvatne i potpune izjave o svom imovinskom stanju i imovinskom stanju članova porodice. Izjave moraju sadržavati podatke o imovini stečenoj od međunarodnog priznanja Bosne i Hercegovine do danas, sa svim navedenim vrijednostima (novcem, nekretninama, firmama, vozilima, te ostalim stvarima od značajne vrijednosti), stečenim u Bosni i Hercegovini i izvan države, s naznakom kako i kada je imovina stečena i koliko je poreza na ukupan prihod građana plaćeno, kako bi se jasno vidjelo šta je legalno stečeno i oporezovano.

3. Predstavnički dom Parlamentarne skupštine Bosne i Hercegovine smatra da nadležni državni organi trebaju, ako postoji, oduzeti svaku vrijednost u Bosni i Hercegovini i inozemstvu, a koja prelazi iznos ili vrijednost onoga što je u izjavi prijavljeno i dokazano, te da sva nelegalno stečena imovina, ako postoji, treba biti usmjerena u humanitarne svrhe uplatom u odgovarajući budžet.